

# श्री हनुमान चालीसा

## ॥ दोहा ॥

श्रीगुरु चरन सरोज रज, निज मनु मुकुरु सुधारि।  
बरनउँ रघुबर बिमल जसु, जो दायकु फल चारि ॥

बुद्धिहीन तनु जानिके, सुमिरौं पवन कुमार।  
बल बुद्धि विद्या देहु मोहि, हरहु कलेस विकार ॥

## ॥ चौपाई ॥

जय हनुमान ज्ञान गुन सागर।  
जय कपीस तिहुँ लोक उजागर ॥ (१)

रामदूत अतुलित बलधामा।  
अंजनि-पुत्र पवनसुत नामा ॥ (२)

महावीर विक्रम बजरंगी।  
कुमति निवार सुमति के संगी ॥ (३)

कंचन बरन बिराज सुबेसा।  
कानन कुंडल कुंचित केसा ॥ (४)

हाथ बन्न औ ध्वजा बिराजै।  
काँधे मूँज जनेऊ साजै ॥ (५)

शंकर सुवन केसरी नंदन।  
तेज प्रताप महा जग वंदन ॥ (६)

विद्यावान गुनी अति चातुर।  
राम काज करिबे को आतुर ॥ (७)

प्रभु चरित्र सुनिबे को रसिया।  
राम लखन सीता मन बसिया ॥ (८)

सूक्ष्म रूप धरि सियहिं दिखावा।  
विकट रूप धरि लंक जरावा ॥ (९)

भीम रूप धरि असुर सँहारे।  
रामचंद्र के काज सँवारे ॥ (१०)

लाय सजीवन लखन जियाए।  
श्रीरघुवीर हरषि उर लाए ॥ (११)

रघुपति कीन्ही बहुत बड़ाई।  
तुम मम प्रिय भरतहि सम भाई ॥ (१२)

सहस्र बदन तुम्हरो जस गावैं।  
अस कहि श्रीपति कंठ लगावैं ॥ (१३)

सनकादिक ब्रह्मादि मुनीसा।  
नारद सारद सहित अहीसा ॥ (१४)

जम कुबेर दिगपाल जहाँ ते।  
कवि कोविद कहि सके कहाँ ते ॥ (१५)

तुम उपकार सुग्रीवहिं कीन्हा।  
राम मिलाय राज पद दीन्हा ॥ (१६)

तुम्हरो मंत्र विभीषण माना।  
लंकेश्वर भए सब जग जाना ॥ (१७)

जुग सहस्र जोजन पर भानू।  
लील्यो ताहि मधुर फल जानू ॥ (१८)

प्रभु मुद्रिका मेलि मुख माहीं।  
जलधि लांघि गए अचरज नाहीं ॥ (१९)

दुर्गम काज जगत के जेते।  
सुगम अनुग्रह तुम्हरे तेते ॥ (२०)

राम दुआरे तुम रखवारे।  
होत न आज्ञा बिनु पैसारे ॥ (२१)

सब सुख लहै तुम्हारी सरना।  
तुम रक्षक काहू को डरना ॥ (२२)

आपन तेज सम्हारो आपै।  
तीनों लोक हाँक तें काँपै ॥ (२३)

भूत पिशाच निकट नहिं आवै।  
महावीर जब नाम सुनावै ॥ (२४)

नासै रोग हरै सब पीरा।  
जपत निरंतर हनुमत बीरा ॥ (२५)

संकट तें हनुमान छुड़ावै।  
मन क्रम बचन ध्यान जो लावै ॥ (२६)

सब पर राम तपस्वी राजा।  
तिनके काज सकल तुम साजा ॥ (२७)

और मनोरथ जो कोई लावै।  
सोई अमित जीवन फल पावै ॥ (२८)

चारों जुग परताप तुम्हारा।  
है परसिद्ध जगत उजियारा ॥ (२९)

साधु संत के तुम रखवारे।  
असुर निकंदन राम दुलारे ॥ (३०)

अष्ट सिद्धि नौ निधि के दाता। अस बर दीन जानकी माता ॥ (३१)

राम रसायन तुम्हरे पासा। सदा रहो रघुपति के दासा ॥ (३२)

तुम्हरे भजन राम को पावै। जनम जनम के दुख बिसरावै ॥ (३३)

अंत काल रघुबर पुर जाई। जहाँ जन्म हरि-भक्त कहाई ॥ (३४)

और देवता चित्त न धरई। हनुमत सेइ सर्व सुख करई ॥ (३५)

संकट कटै मिटै सब पीरा। जो सुमिरै हनुमत बलबीरा ॥ (३६)

जय जय जय हनुमान गोसाईं। कृपा करहु गुरुदेव की नाई ॥ (३७)

जो शत बार पाठ कर कोई। छूटहि बंदि महा सुख होई ॥ (३८)

जो यह पढ़ै हनुमान चालीसा। होय सिद्धि साखी गौरीसा ॥ (३९)

तुलसीदास सदा हरि चेरा। कीजै नाथ हृदय महँ डेरा ॥ (४०)

## ॥ दोहा ॥

पवन तनय संकट हरन, मंगल मूरति रूप।  
राम लखन सीता सहित, हृदय बसहु सुर भूप ॥

© Bhakti Hub | All Rights Reserved

<https://bhaktihub.in>

© bhaktihub.in